

mettre des pendans. Ils fient leurs dents pour les faire paroistre plus belles: ils ne se marient point devant les 40 ans, iacoit que les filles des l'age de dix ou douze ans y soyent defleurees. Les autres Provinces sont Anavares, Albatozia, Iaquazia, Apalachia, Autia, Samovia, & autres: toutes lesquelles vivent d'estrange sorte, sans religion, police ny ordre. La meilleure & plus fertile partie de la Floride est proche de la Nouvelle Espagne: estendant iusques à la Riviere & Province de Pautico: laquelle Riviere espand de si grands courans en mer qu'on y peut trouver des bons havres pour les navires.

CHAPITRE II.

Description des Costes de la Floride.

L Estendue de la dernière pointe de la terre appelée Terra di Laborador au Cap de S. Helene en la Floride a esté cy devant representee. Le dit Cap de S. Helene git à 32 degrez. Là se trouve vne belle & large Riviere qui surpasse toutes les autres de la mesme Coste Septentrionale: à raison dequoy elle est par les François appelée Port Royal, la ou se trouvent dix brasses de profondeur. Es environs de ceste Riviere voyent plusieurs Boscages de Chenes & de Cedres là ou se tiennent plusieurs Cerfs & autres bestes Sauvages & des Paons. L'emboucheure de ceste Riviere est large de trois lieues, & a deux pointes dont l'une s'estend à l'Oest & l'autre au Nord. Sur ceste mesme Riviere les François bastirent vn fort nommé Charlesfort. On estime qu'elle s'estend iusques à vne autre Riviere nommée Jordan, & quelle a issue en vne autre mer. Entre ces deux pointes au devant de l'emboucheure git vne belle Isle pleine d'arbres.

Port Royal.

Estendue & distance des Costes

De S. Helene à Rio secco on conte 40 lieues d'Espagne qui font dixsept degrez & demi, & git ceste Riviere à 31 degrez de hauteur.

De Rio Secco à S. Croix il y a 40 lieues: & delà à la pointe de Canuaverai, qui git à 28 degrez, il y a aussi 40 lieues.

Icy nous convient vn peu arrester, & reprendre vn peu ceste Coste laquelle du depuis a esté proprement descouverte par les François, & par eux descrite.

De S. Helene naviguans au Sud le long de la Coste iusques à la Grande Riviere ils content 4. lieues Françoises.

De là à Guade ou Guate, & plus outre à Bellus, & de Bellus à Cironde & de Cironde à la Garonne, & plus outre à la Charante, & de la Charante à la Loire 6 lieues.

De la Loire à l'Auxone à l'emboucheure de laquelle pareillement se void vne Isle & de l'Auxone à la Seine six lieues. Et gisent toutes ces neuf Rivieres en l'espace de 60 lieues Françoises.

Diverses Rivieres.

Laisant la Seine & naviguans au Sud le long du Rivage on passe la petite Riviere de Serravahi, puis on vient à la grande Riviere de May, ainsi nommée pource qu'elle fut descouverte le premier iour de May par Landonier: elle git à 14 lieues de la Seyne. Là autour se voyent plusieurs rouges & blancs Meuriers où se tiennent plusieurs Vers de Soye.

De ceste Riviere on vient en vn Gouffe qui s'estend vn petit dans le Pays là où fut la première arrivee de Landonier venant de France, lequel vit en ceste mer là plusieurs Pores Marins ou Dauphins pres de l'emboucheure d'une Riviere, laquelle à ceste occasion il nomma la Riviere des Dauphins.